

Associazione Pro Loco Carloforte, *L'Odissea umana e cristiana dei Carolini catturati dai pirati tunisini nel 1798*, Unigester Libri, Ragusa 2014, pagg. 152

Bruno Rombi, *Il mare è una sirena*, Condaghes, Cagliari 2017, pagg. 96

Tito Bruna, *Pegliesi di Tabarca*, Ateneo Edizioni, Genova 2017, pagg. 56

Pro Loco di Carloforte, *Carloforte. 280° Anniversario della Fondazione (1738-2018). Un viaggio nei secoli. Storie, Immagini, Personaggi del Popolo Tabarchino*, 2018, pagg. 74

Carloforte (che i seu abitanti ciamman U Pàize) e Câdezèdda en comuni ònòrari da Çità Metropolitanna de Zena, riconoscimento dovùo pe-a tenacia dimostrâ into mantegnî léngua e tradiçioin liguri a despeto do tempo e de traverscie comme quella contâ into primmo libro, publicòu pe-o 50° aniversaio de l'incoronacion da Madòna do Sciaivo.

O segundo o l'é in libro de raconti ambientæ a Câdezèdda, dove l'outò o l'ea nasciuo e dove o l'âiva lasciòu o cheu, sciben ch'o l'ea pòi de longo visciuo a Zena e chi mancòu pòco tempo fa: gh'é in seu ricòrdo a pag. 29 de questo boletin.


O tèrso libro o l'é a ristampa anastatica de 'na publicacion do 1899, òpia do segretaio-cappo de l'aloa comune de Pegi, ch'o-a concludde co-o dî che a Pegi comme a Carloforte gh'é 'na gran netixe, a gente a l'é paxa e no gh'é ni pòvei ni delinquenti.

L'ùrtimo o l'é 'n arecugèita de saggi, testimonianse, ricòrdi e poexie, con tante bèlle inlustraçioin.



Maria Luisa Bianchi e Andrea Panizzi, *Carlo Dapporto 30... e lode!*, De Ferrari, Genova 2019, pagg. 240

Dòppo o libro che gh'à dedicòu a figgia Giancarla (boletin 2-2018), ecco 'n atro òmaggio a questo "principe" da rivista, in sanremasco che mai, sciben ch'o stava de caza a Romma e o giava l'Italia, o s'é ascordòu da seu çità. I outò s'én spartii o travaggio. A Bianchi a l'é 'na ponentinn-a che, conosciuo o figgio Màscimo e trovòu pe caxo inta sofita de l'ùrtima caza sanremasca de l'atò 'na valixe e in scatolon pin de ricòrdi, a l'à misso insemme a primma parte do libro: tantiscime fotografie, létie, testimonianse che ne fan conosce l'òmmo Dapòrto. A cariera de l'atò, invece, ne-a conta o Panizzi inta segunda parte, faxendo anche a stòia de quello genere tutto particolare de spetàcolo ch'o l'é stæto, primma a-o tiatro e pòi in televixon, a rivista co-i seu brillanti protagonisti.



Carlo Peirano e Emilia Garaventa Cazzulo, *La Nave scuola Garaventa. Una scuola di vita*, De Ferrari, Genova 2016, pagg. 226

Quella da "Garaventa" a l'é stæta 'na mâvegjoza aventùia ch'a l'à cangiòu a vitta e o destin de tanti figioami aviaè da-a sòrte in sce de brutte deschinæ. O seu fondatò Nicolò Garaventa, profesò de matematica do liceo D'Òia, o l'âiva inparòu in famiglia a caitæ: seu barba præ Loenso o l'âiva tegnuo in caza sò, in Pontexello, 'na scheua de badda pe-i figgi da pòvia gente e lê o l'à vosciuo fâ ancon de ciù e o l'à creòu a "Nave scheua Redençion", 'n istitucion amirà e imitâ da atre çità in Italia e into mondo. O sciò Peiran, stæto l'ùrtimo comandante da "Garaventa", e a sciâ Emilia, pro-nessa do fondatò, àn vosciòu scrive insemme questo libro, pin de fotografie e testimonianse, perché no se ne pèrde a memòia.

